



In panorama dal Signuradi, malegià enturn l'onn 1750. La pictura dad in artist nunenconuschent sa chatta en possess privat dal Schloss Bothmar a Malans. Ins vesa bain las numerusas vignas en il conturn.

FOTO ANDREA BADRUTT

# Il vin grischun ch'è madirà sur plirs tschientaners

Vers la fin dal 2024 ha l'istoricher Martín Camenisch preschentà sia publicaziun davart l'istorgia da la viticultura en il Grischun. Il linguist Chasper Pult ha ussa – en occasiun da la vendemia da quest onn – preni in sitg or dal cudesch che tracta da vins d'investg, dad imports da vin vuclina e da la predominanza dal Blauburgunder en il Grischun.

CHASPER PULT

L'october fa givlar ils cors da las viticulturas e dals viticulturs. Betg per cas na vegn quest mais numnà il mais dal vin. La gronda part da las ivas plainas e madiras, alvas u blauas, è gia racoltada. Ils vendemiaders han festegià la vendemia, sper il plaschair da cleger l'iva en buna compagnia turnan els a chasa cun ina buttiglia vin da l'onn passà sco quai ch'igl è usit tar nus en il Grischun.

Cun leger sin las tavlas infurmativas lung l'autostrada en la Val dal Rain «Bündner Herrschaft – die kleine Gegend der grossen Weine» èn in pèr forsà in zichel perplex. Era nus essan surstads che nagin n'ha sprayà suren «dümmer goht's nümmer!» Pertge avess il Signuradi dad esser ina regiun pitschna? E tgisà sche tut ils vins èn propi grond, in grond vin è per regla quel che gusta. Dumondas naschan sco p.ex. «Herrschaftler» e «Blauburgunder» – Tge è quai atgnamain?».

## Mai udi da vin grischun a Laax

L'istoricher grischun Martín Camenisch scriva en l'introducziun da ses cudesch da passa 500 paginas cun il titel forsà in zichel misterius a prima vista «Gutsherren, Rebmeister und Tagelöhner – Akteure und Diskurse der Bündner Weinbaugeschichte» che el sez n'avevi mai udi a discurre dals vins en il Grischun durant sia uffanza a Laax. Sper sia lavur sco docent a la Scola auta da pedagogia dal Grischun ha el perscrutà durant blers onns la tradiziun da la viticultura grischuna, per incumbensa da l'Institut per la perscrutaziun da la cultura grischuna. Grazia a sia captivanta lavur istorica savain nus oz bler dapli co ch'ils vins dal Signuradi, ma era quels da la Vuclina, vegniván cultivads e producids. L'istoricher parta dals temps medievals e tracta surtut las funtaunas dal 18 e 19avel tschientaner, ma era las midadas avant paucs decennis.

## Resursa economica e funcziun da represchentanza

Martín Camenisch ha reconstruì sin fundament da diaris, brevs ed ulteriuras funtaunas detagliadamain ils pass da lavur tradiziunals durant l'onn da vin. Tgi che vul savair dapli dad in dals secturs da l'agricultura che pretenda ina lavur ordvart intensiva durant l'entir onn, quel u quella po emprender bler legend la publicaziun. L'autur ans avra fanestras per seguir il mintgadi dals patrums dals bains e dals maisters viticulturs, ma era ils schurnaliers e lur salaris dal di san interessar, sco era las ordinaziuns ed ils reglaments fin ozendi.



In maletg dal mais settember en la baselgia Santa Maria del Castello a Mesocco – in pictura murala dal 1459. Durant il settember vegniván adina preparads ils butschins da vin.

MALETG MAD

## Martín Camenisch ha reconstruì sin fundament da diaris, brevs ed ulteriuras funtaunas detagliadamain ils pass da lavur tradiziunals durant l'onn da vin.

Il cudesch «Gutsherren, Rebmeister und Tagelöhner» rapporta da vins da l'investg e da claustras da pli baud, oravant tut da la tradiziun millennara da la

claustra da Faveras che finescha l'onn 1838. Nus vegnin a savair da tut quai che serviva a producir vin, be gia ils torchels per pressar l'iva vegnan tractads sin bunamain sis paginas.

Dapi il 16avel tschientaner eran las vignas grischunas, da la Val dal Rain grischuna fin en la Vuclina, per ils possessurs ina resursa economica impurtanta ed ellas avevan era ina funcziun da represchentanza. Vers la fin dal 18avel tschientaner ha la naschienscha d'ina classa mesauna promovì adina dapli la viticultura.

En la famosa festa giubilara da l'onn 1899 per ils 400 onns dapi la battaglia da Chalavaina ha il public udi cun la chanzun «Das Lied von der rätschen Traube» quai che blers pensan anc oz: «Der Weinberg, der ist ein heidnisches Gut, ihn pflanzte der Römer am Raine.»

## Avant ils Romans ed avant Tello

Martín Camenisch mantegna trasora ina perspectiva scientifica, quai vul dir critica, ed el scriva che l'arrivada da la «vitis vinifera» – en rumantsch numnain nus la planta la vit sco en talian la vite – posia era esser capitada gia avant la coloni-

saziun dals Romans. Retschertgas fatgas dacurt en il Vallais inditgeschan la probabilitad che la viticultura en zonas alpinas pudess datar pli lunsch enavos.

Per il Grischun è il testament da l'investg Tello dal 765 a.C. la funtauna la pli veglia che menziuna «ortos et vineas» a Sagogn, damai sper curtgins era vignas. Era qua relativescha Camenisch la relevanza da Sagogn per la viticultura en nosas cuntradas. Interessant dentant è la recenta emprova da producir vegls vins sin quasi 800 m s.m. cun il num «Resvegl». Quella vigna na fa però betg part dal catter chantunal da viticultura ed il vin produci da tala n'astga damai betg vegnir vendì, quai ch'è grev da chapir. Dapi decennis pretendan ils viticulturs en la Val dal Rain che tut ils auters territoris sajan memia auts per la cultivaziun da vin, ferant che ils Vallesans vendan cun grond plaschair lur vin dals glatschers ed il Heidi da Visperterminen sin 1360 m s.m. Las vignas istoricas cumprovadas sco era la midada dal clima demussan quant ridicula che questa argumentaziun dapi 1951 resta.

## Tips e trics per viticulturs

Er il vin da la vigna che l'autur da questas lingias cultivescha – sur la batgetta da sia dunna – en Tumleasta dapi passa ventg onns sto vegnir bavi en famiglia, quai che n'è betg in problem! Per nus sco viticulturs laics è la part dal cudesch, nua ch'el descriva ils pals per «educar» las vits zunt interessanta. Quel uschenumnà «Stickelbau» na vegn betg pli pratigà ozendi, la nova metoda cun trair filifiers per liar las frastgas da las vits è bler main fadiusa. Martín Camenisch descriva ch'els pals eran savens or da lain da laresch. Nus avain fatg l'experientscha che quels smarscheschan en in pèr onns, ma nus refusassan da's prender ora durant l'envern sco che quai vegniva fatg per part.

## «Jeu sun pli fins che Ti!»

Aspects novs e per part divertents vegnan era menziunads en la publicaziun «Gutsherren, Rebmeister und Tagelöhner», sco il complex d'inferiuradad dals viticulturs grischuns envers ils collegas da la Valtellina. En ina chanzun che vegniva chantada en Surselva fa il vin disputa cun l'aua e di: «Jeu sun pli fins che Ti! Mei meinan ei ord Valtina, e meinan si la Cadi.» L'import dal vin da la Valtellina sto esser stà fitg impurtant, sin la fossa dal interpretider Mathias Perl a Santa Maria en Val Müstair vegn menziunà ch'el haja pers 210 chavals e set famegls en lavina cun transportar vin da la Vuclina.

## Da Completer e Blauburgunder

L'istorgia dal vin alv Completer, forsà l'unica sort autoctona grischuna ch'els paders bevevan a la fin dal di clerical, vegn descritta en detagler en connex cun la discussiun areguard la patria durant il 19avel secul. L'exclusivitat sco argument per la vendita sa ha mantegnì fin oz, la cultivaziun è augmentada gist quests ultims onns, ma cun 1,47% da la surfatscha cultivada cun vignas, resta ella anc fitg modesta en congual culs 70% dal Pinot noir. Areguard quest «Blauburgunder», sco che la sort principala vegn numnada en il Grischun, è Martín Camenisch puspè precaut e scientificamain integer cur ch'el menziuna ch'i na dat nagina cumprova ch'il Duc da Rohan avess introduci en il 17avel tschientaner questa sort da la Frantscha durant ils Scumbigls grischuns.

## In viva als perdavants

Bleras illustraziuns enritgeschan questa ovra istorica concepida cun sia vastezza era per tuttas e tuts che vulan simplamain savair dapli davart in sectur economic detg impurtant dal Grischun. Sco exempel duess valair l'emprim maletg sin duas paginas che documentescha cun in disegnil plan per la via tras il Lürlibad a Cuira en connex cun la construcziun da la clinica «Waldhaus». Nus vesain l'immensa surfatscha da vignas en la chapitala cun 12 torchels! A Cuira datti mo pli paucs fastizs, ma las spassegiadas en il Signuradi pon fascinar er oz anc pli che mai. Nus faschain perquai viva a noss perdavants ed a quellas e quels che cuntineschan oz cun la viticultura en il Grischun!



La publicaziun «Gutsherren, Rebmeister und Tagelöhner – Akteure und Diskurse der Bündner Weinbaugeschichte» (Basilea, 2024) da Martín Camenisch è accessibel en librerias.

Chasper Pult da Pasqual è linguist, translatur ed intermediatur da cultura.